

## Iluarsiissut

Siunnersuut 10. august 2021-meersoq taarserpaa.

(Oqartussaaffiit allanngornerisa kingunerannik Naalakkersuisup akisussaasuusup iluarsiinera)

**Kingornussisarnermik inatsisip, aappariit pigisaasa agguarnerat pillugu inatsisip, toqusup pigisaasa agguarneqarnerat pillugu inatsisip aamma eqqartuussisarnermik inatsisip, akiliisinnaajunnaarnej pillugu inatsisip, eqqartuussivikkoortumik nalunaarsuineq pillugu inatsisip, aappariinnerup inatsisitigut sunniutai pillugit inatsisip kiisalu inatsisit allat allanngortinneqarnerisa (Toqusup pigisaasa agguarnerat pillugu inatsisip malitsigisaanik allannguinerit) Kalaallit Nunaanni atuutilersinneqarnerannik peqqussutissatut missingiummut Namminersorlutik Oqartussat isumaqataanerat pillugu Inatsisartuni aalajangiiffigisassatut siunnersuut**

(Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut Naligiisitaanermullu Naalakkersuisoq)

### **Saqqummiussissut**

(Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut Naligiisitaanermullu Naalakkersuisoq)

### **Siullermeerneqarnera**

Arlalissuulluta kingornussassat pillugit suliami nammineq peqataasimavugut taamatulluunniit ingerlataqarsimasunik ilisimasaqarluta. Taamaattumik aliasunneq, ilaqutariinni attuumassutit inatsisinullu tunngasut ataqatigiissinnissaat sapernarsinnarsinnaasartoq nalunngilarput. Taamatut pisoqartillugu inatsisit pisoqalisut inuiaqatigiinni ullutsinni ilaqutareeriaatsinut innimittanngitsut atorfissaqartinneqanngillat.

Kingornussisarnej pillugu inatsit atuuttoq 1964-imeersuuvoq, taannalu ullumikkumut allanngortinneqangaarsimanngilaq. Malittarisassanik nutaarluinnarnik pisariaqartitsisoqarpoq. Kingornussisarnermik inatsit nutaaq nutaaliaasorlu Naalakkersuisunit inuussutissarsiortunillu sivisuumik kissaatigineqarsimavoq. Taamaattumik aalajangiiffigisassatut siunnersuut manna Naalakkersuisut sinnerlugit saqqummiussinnaagakku nuannaarutigaa tulluusimaarutigalugulu.

Kingornussisarnej avinnerlu pineqartillugit peqqussutit pitsannguutitik arlalinnik nassataqassapput.

Kingornussassat ilaat pinngitsoorani kingornussassat, nammineq aalajangiiffigineqarsinnaanngitsut, appartinnerinik kingornussisarnej pillugu inatsimmut peqqussut kinguneqassaaq. Tamanna kingornussassat pillugit aalajangersaanissamut annertunerusumik kiffaanngissusiliivoq. Aappariit meeqqallu akornanni kingornussassat naligiinnerusumik agguarneqartarnissaat aamma eqqunneqarpoq. Taamaaliornikkut apparisaq annaaneqarpat aningaasaqarnikkut taamarsuaq sakkortutigisumik eqqugaasoqassanngilaq.

Suliffeqarfimmik piginnittoq toquppat suliffeqarfik kingornussanut ilarujussuusarpoq. Kingornussisussat tamarmik kingornussassamik pissarsitinniarlugit suliffeqarfiit ullumikkut tunineqartariaqartarput matuneqartariaqarlutilluunniit Kingornussassat aalajangersimasumik annertussuseqarpata nammineq meerarisanut pinngitsoorani kingornussassat killeqartinnissaannut malittarisassat nutaat periarfissaqartitsilerput. Tamatuma suliffeqarfinni kinguaarit nikinnissaat ajornannginnerulersissavaa, pisuussutit annertunerusut

kingornussisussamut suliffeqarfimmik ingerlatsisussamut tutsinnissaannut piginnittoq  
aalajangiinissamut periarfissaqalermat. Taamaalilluni pisuussutit  
suliffeqarfimmiinnassapput.

Aappariit toqusoqarnera imaluunniit avittoqarnera pissutigalugu aappariikkunnaarpata  
aappariit ataatsimut pisuussutaat agguarneqassapput. Tamanna aamma taaneqartarpoq pigisat  
agguarneri. Toqusup pigisaanik agguaassineq pillugu inatsimmut peqqussutip aappariinnermilu  
pigisat agguarneri pillugit inatsimmut peqqussutip kingunerissavaat ullutsinnut  
naleqqunnerulerneru, kiisalu toqusoqarnerani avittoqarneranilu pigisanik agguaassinnermut  
malittarisassat erseqinnerulerneru.

Aappariinnut katissimanngitsunut inatsisit aamma pitsanngoriartitsissapput, imminnut  
kingornussinnaanermut aalajangersaaneq kingornussassialiamik  
pilersitsiuminarnerulersitsissammat. Peqatigisaanik qimakkunik pisuussutimik  
agguarnissaannut eqqartuussivimmit ikiorneqarnissamut periarfissaapput.

Naalackersuisut taamatut oqaaseqarlutik immikkoortoq Inatsisartunut  
oqaluuserisassanngortippaat.